

Pɔɔl Gbanƙa Ate Wa Nmarisi A Te FILIPAI DEMMA La

¹ Mi Pɔɔl, ale a nmarisi gbanƙa de a te ni. Mi ale nuru waai ate ba a wi ayen Timoti la ate ti chim Yeezu Kirisita tomteerɔba la a puusi nama ale ni kpaɗɗa ale ni maarima baai meena ale ka Naawen nuruba a bo Filipai tenƙa la.

² Ti Kowa Naawen ale ti Nyɔnɔwa Yeezu Kirisita le niak ni abe ba te ni suyoɗgini.

³ Mi kasim a poli ni wie kama ale a puusi Naawen a te ni. ⁴ Mi dan boro a puusi a te ni, mi sui a nyeem a kasim a peenti ka nna yegayega. ⁵ Dii nyin la, a ta nyini dii po ate nama a wom Naawen wamaɗsaɗa wie la, ni nyeem a kasim jam a maari mu kama ate maa weeni nuruba wa wie. ⁶ M seba ayen Yeezu Kirisita a dan pilim jam, Naawen a yaa le nueri tuim ɗaai ate wa poom a lin boro a tom ni jigi la. ⁷ Ku nala kama ate mi kasim ta ni wie m sunum po nnala, dii nyin la mi ta yaalika kama ale ni nalimnyiini. Ba dan yik mu a ta ga lik a yaase mi ale za Naawen wamaɗsaɗa ɗaɗɗ a sak nuruba ayen ɗa ka wensie la, Naawen a kasim a maari mi ale nama me kama. ⁸ Naawen ka mi seero ayen mi a biisi ka wensie, ase m nin weeni ayen yaali kaai ate m ta ale ni la a nyini ka Yeezu Kirisita sunum po.

⁹ Dila nyin la a zaani dii po ate tama wom ni la, ti kasim a puusi Naawen a te ni kama ayen

yaali kaai ate ni ta ale chaab la, le kasim zuak yegayega. Daa dila nyiini abe ni seba ka me a nmasi zuek wie meena po, ¹⁰ ate ni nyeem a baga a lueri wa wensie siuku abe ni a va ku. Ni daa nyɛ dila ate Kirisitawa a nman pilim jam, ni le baga a tu wa ale welensa ale kan ta kaasunɔa wa jigi ya. ¹¹ Yeezu Kirisita a le maari ni ate ni chim nuru mansa nna yegayega. Nuruba a le nya nama tuima ale ka dii la a yaali ayen ba a pak abe ba a te Naawen zula.

¹² M suaata, maa yaali kama ayen m weeni a sak ni ayen ba le yik mi a lik dii la a basi kama ate Naawen wamanɔa a tagli nuruba yegayega jigi. ¹³ Siiza sojima ale a limsi mi la ale baai meena ale bo dela la a seba kama ayen ba yik mi a lik ka mi ale a va Yeezu Kirisita la nyin. ¹⁴ Nyaku de nyin, Yeezu njanviirima ba yega a jam ta sunum pagrik ayen ba a sak nuruba Naawen wamanɔa wie.

¹⁵ Nuruba ba gela baai ale ta nyuri ale mi la, a sak nuruba kama Yeezu Kirisita wie, alege baai me ale kan ta nyuri ale mi la a sak nuruba wa wie a maari mi. ¹⁶ Baai ale a maari mu la a yaali mu kama ale seba ayen ka Naawen ale pa mi a zaani dela jigini ayen m za wa wamanɔa wienɔa njan. ¹⁷ Baai me ale ta nyuri ale mi la, a sak nuruma Yeezu Kirisita wie ale ka ba noa po wie nyiini. Ba ka butueta nyam ale a yaali ayen ba nyɛ ate m nmasi a nam yegayega a gum m ninammu de po likka dokku de po.

¹⁸ Alege dila a kan kaasi. Ba gela a sak nuruba Yeezu Kirisita wie kama ale ba popo meena, alege ba gela me a sak ba wa wie ale ba noa

po wie nyiini. Ku peenti mi sui kama, dii nyiŋ la nuruma de meena buyewa a basi kama ate nuruba wom Yeezu Kirisita wie. ¹⁹ Ku be ŋman peenti m sui dii nyiŋ la, mi seba kama ayen ba le jam a yeeri mi likka dokku de po a basi boan nyiŋa nama puusaŋa ale Yeezu Kirisita Naawen Chiika maarika le basi kama ate ba yeeri mu. ²⁰ M le potim a yaali dii ale m sunum meena ale ta yiila ale di la ale m kan tom m tuima a kpeeri dii po dii po. Mi a yaali kama dii po meena wuu ayen ale yogyogla de, m kasim ta nyiŋbiiri nna yegayega a tom ate ku ta zula a jam Kirisita jigi dii meena wuu m kpi yoo mi an kpi yoo. ²¹ Boan nyiŋa, m boka kiri ale boa? M boka kiri ale m kasim a va Yeezu Kirisita nalimnyiini, dii nyiŋ la m dan kpi m le bo ale wa. Kula a zunchoŋa kama. ²² Alege mi ze kuui dek ate mi yaa m lueri la, ase m nin diem ta nyuvuri, a бага a tom tuimmaŋsa yegayega a te wa a gum du yaa, m nin kpi. ²³ Wienja de ŋayewa a daani mu kama nna yegayega m sunum po. M kasim a a yaali kama ayen m kpi a ga bo ale Yeezu Kirisita. Kula a zunchoŋa m teŋzuk de boka kama, ²⁴ alege ku ka wamaŋ nalimnyiini ate m boro ale ni a zunchoŋa gaam m nin kpi. ²⁵ M seba ayen ku a magsi kama ate m bo ale ni ate m бага a maari ni ate ni ta siaka nalimnyiini ale Yeezu abe ni sue a peenti nna yegayega. ²⁶ M be dan jam ayen m ŋman bo ale ni, nama a le zak m zuk a zaani abe ni a te Yeezu Kirisita pimpauk mi nyiŋ.

²⁷ Yogyogla de, wamaŋka ale, ni basi ate ni boka a va ale Kirisitawa sinsaŋa ale a weeni

dii la ate m dan poom a jam ni jigi nwuli a yaa se m beni ale ni wie womka, m le seba ayen ni ta noai yen kama ale chaab ale kpesi za magsi me. M le nman seba me ayen ni nina a muni ka nna yegayega ayen ni a sak nuruba Naawen wamanɗaɗa njaai ale basi ate ba a ta siaka ale wa la. ²⁸ Ni kan pooma a chali ni dachaasaɗa yogsum ale maga dek me la. Nyaku de a le sak ba ayen Naawen dek a le jam dai yen po a nya ba kaasunku abe wa nye ate ba kan ta kiri ya. Ku le sak nama me ayen wa le jam a vari ni ni tuimbaataɗa po a kasim basi kama meena meena. ²⁹ Boan nyaɗa, Naawen an basi kama ate ni ta siaka nyiini ale Yeezu Kirisita alege wa basi kama me ate ni a nam wa nyin. ³⁰ Yogyogla de ni gum mi po ate ti nye kpalinɗa, kpalin kaai ate nama a wom ale mi a kpalim la. Be ka kala ale la ate me diem a kpalim.

2

¹ Yeezu Kirisita waai ate nama a va la a le basi ate ni pagra ale wa yaalika ale nama le ka dii la a le te ni sudunni. Naawen Chiika ale basi ate ni ta noai yen ale chaab, wa le maari ni ate ni a yaali chaab abe ni ta jirim me ale chaab. ² Maa saalim ni kama ayen ni basi ate ni popola meena a chim bunyi abe ni kasim a a yaali chaab nna yegayega. Ni dan a nye nyaku de, ni a basi kama ate mi sui a kasim a a peenti nna meena meena. ³ Ni kan chim bu tueta nyamma abe ni kan a nak kuusa a poli ayen nama zuak gaam ni chaaba, alege nama dek a ti an seba ni dek yik ka. ⁴ Ni kan a poli ni dek nanta nyiini wie, alege ni a poli

ni vaanchaab ale ba nanta jigi wie. ⁵ Ku a fe ate ni ta popola n̄aai chaab ate Yeezu Kirisita jam ta la:

⁶ Wa jam ka Naawen alege wa kan jam a yaali ayen wa ta pagrim a soa ase wa le jam ka dii la ate ba chim bunyi. ⁷ Wa jam pa wa le ka dii la kama a basi n̄aan̄ ale ge a chim tomteero ase nuru biik la. ⁸ Wa jam ka nuru waai ale seba wa dek yikka la ale a zuli Naawen noai a kpi jabarimu nyin̄.

⁹ Dila nyin̄ ale soa ate Naawen a zak wa a zaani nin̄ ale te wa yue dii ale zuak a gaam yue meena la, ¹⁰ ate baai meena ate Naawen a nȳe ate ba bo wennȳmazuk ale ten̄zuk meena la ayen ba meena jam kpi dunduna ten̄ wa nin̄ a te wa zula. ¹¹ Ba meena a le nyini peelim weeni ayen, Yeezu Kirisita ale ba Nȳon̄o. Ba dan nȳe dila, ku le te wa Kowa Naawen zula.

¹² Dila nyin̄ la, m dek d̄oaba, ase mi ale jam bo ale ni la, ni a zuli mi noai, alege ȳogȳogla de ate mi n̄man karo ale ni la, ku magsi ka ni deema a zuli mi noai nalimnyini. Ni pii nyin̄ nalimnyini a tom wa tuimaṅa ale kpazinagsuk ate wa vari ni ni tuimbaataṅa po a basi. ¹³ Naawen abe ale kasim bo ni suniimaṅa po a tom la, wa a yaali kama ayen ni a tom wien̄a de n̄aai ale a te wa supeentik la. Wa be a te ni pagrimu me kama ate ni tom dii ate wa a yaali ayen ni tom la.

¹⁴ Ni a tom wa tuimaṅa abe ni ka a n̄uuni ale ni vaanchaaba a yaa se ni ta nampaga ale chaaba.

¹⁵ Dila ale basi kama ate ni welema ni suniima po abe ni kan ta kaasun̄ Naawen nimbie po, dii nyin̄ la ni ka wa bisa. Baai ale ka tuim kaasima nyam

a kasim a tom tuimbaata nna yegayega la, a boro a gilim ni kama. Ni basi ate ni tuimman̄saṅa a nyagsi ba sunsuṅ a se chin̄marisaṅa ale a nyagsi dii la. ¹⁶ A sak ba ayen Naawen a yaali kama ayen wa pa wa nyuvuri dii ale kan ta kpeglimka la a te ba. Ni daa nye dila ate Yeezu Kirisita a ṅman jam, ni le zak mi zuk a zaani. Dii nyiṅ la, tuim ṅaai meena ate mi a tom a te ni la, a kan chim kayiowa.

¹⁷ Mi a dan poom kpi nama siaka nyiṅ, ku a nye ka nna ase m pa m dek a kaab te ka Naawen la. Ku be dan ka dila mi ale nama meena ta ka supeentik. ¹⁸ Siuk kula po ku a fe kama ate nama jam gum mi po ate ti maa chaab a ta supeentik.

¹⁹ Ti Nyonowa Yeezu Kirisita dan te siuk, ku kan beni ale ge ate m tom Timoti ni jigi ate wa dan ṅman pilim jam mi jigi, abe wa ta ni wie a jam paali a sak mu, ate ku te mu nyiṅbiiri. ²⁰ Wala nyiini ale bo ale mi dela ate wa niṅ a maa bo ale ni a gum mi po. ²¹ Baai ale tali bo dela ale mi la, niṅ a bo ale ka ba dek wie po, alege ba niṅ ka ale Yeezu Kirisita wien̄a. ²² Alege ni meena seba Timoti ale ka nuru maṅ la kama. Ni be ṅman seba me mi ale wa ale a maa chaab a tom dii nna ase biik ale ka ko la a sak nuruba Naawen wamaṅsaṅa wie. ²³ Dila nyiṅ la, m dan ga seba wie a le ṅa nye dii ni jigi la, m kan beni ale ge tom wa ni jigi ya. ²⁴ M ta siaka ale Nyonowa kama ayen ku kan beni alege ate mi dek a бага jam ni jigi ya.

²⁵ Maa poli ayen ku magsi kama ate m tom ti vaanchoawa wanyiwa ate ba a wi wa ayen Epaforodaitus la, ate wa jam ni jigi. Wala ate

nama jam liɲ tom wa ayen wa jam a maari mu la. Wa le jam la, wa kasim a pii ka nyiɲ nna yegayega ate mi ale wa a boro a tom nalimnyiini ale chaab dela jigini. ²⁶ Wa kasim a yaali kama nna yegayega ayen wa ŋman jam ni jigi a nya ni. Ku jam kasim a daani wa kama wa popola po nama ale wom ayen wa jam ka nyiɲyɔgsa la. ²⁷ Ku ka wensie ayen wa ale jam kan ka nyiɲyɔgsa la, ku jam tali ka maga dega ate wa kpi, alege Naawen jam ta jiirim ale wa kama ate wa ŋman nya nyiɲyɔgsa. Naawen a jam ta jiirim ale mi me kama, dii nyiɲ la wa dan jam kpi kama mi sui te kaasi ka nna yegayega, wie ŋai ale gilim mu a daani mu la po. ²⁸ Ka dila nyiɲ ale soa te maa yaali ayen m tom wa ate wa jam ni jigi yɔgyɔgla de la. Wa dan jam ate ni nya wa ni sue a le peenti abe mi me dek sukaasuɲku a be. ²⁹ Wa be dan jam ni jigi ate ni nya wa, ni tuesi wa nalimnyiini ale masim, dii nyiɲ la ti Nyɔɔwa nyiɲ. Ni a te nuru baai meena ale a nye a se wala la zula, ³⁰ dii nyiɲ la wa, pa ka wa nyuvuri da a tali maga ate wa kpi Yeezu Kirisita tuimaɲa nyiɲ ayen ku te mu maari kaai ate nama dek an бага a te mi la.

3

¹ M suaata, ni basi ate ni sue a peenti ti Nyɔɔwa nyiɲ. Mi liɲ ŋmarisi weeni ni ka wari alege maa yaali ayen m ŋman ŋmarisi ka dila degadega, ku be kan daani mi, dii nyiɲ la, ku le maari ni kama ate ni kan lo. ² Ni kpesi ni dek ale baai ale gebi ba yuaɲa ale a tom tuimbaata ale ge ba a yaali ayen ba gebi nama me yuaɲa

la. ³ Ba ale a gebi ba yuaŋa dii la a kan va ku siuku ale ka dii la. Naawen a kan yaali ayen tama a gebi ti deŋ dila, dii nyiŋ la wa pa ka wa Chiika a nyo ti suniimaŋa po, ate ti baga a zuli wa ale wensie. Yɔgyɔgla de ka Yeezu Kirisita ale soa ti. Dila nyiŋ la ti ŋman ka wari ale nuruba ale a tom ba tuima dii ale ba deŋ zupuuta la. ⁴ Ase ku dan ka wensie ayen, nyaŋa de nyeka ka wamaŋsa nalimnyiini, mi deŋ ate ta siaka ale ŋa kama a gaam waai meena. ⁵ Mi nyini ka Izirali buuni po, Benjamin doŋku biik, dila la m kowa ka Juu. A se ba le jam a biak mi ate mi a nya daa ŋayopoi la, ale ba gebi mi yoani. Mi yaa le jam a chim la, ate mi yaa a chim nuru baai ate ba a wi ba ayen Farisiiba la po wanyi. Nuru bala a jam ka baai ale jam a va Juuma kisuktaŋa nalimnyiini la. ⁶ Nuru waai an diem a jam baga a weeni ayen mi diem a jam nye Juuma wari dinyi me la a kaasi ya. Dila nyiŋ la, mi jam chim ka wayɔrisima nyɔɔ wiŋa de po. Mi nina jam kasim muni kama ate mi daani baai ale a va Yeezu la. ⁷ Dila powa mi jam a poli kama ayen mi le nya nyuenta wiŋa de meena po kama alege yɔgyɔgla de ate mi a yaali ayen m seba Yeezu Kirisita la, m seba ayen ŋala meena a chim ka wakayaata mi jigi. ⁸⁻⁹ La wensie ate mi a weeni ayen jaab buuri meena ate mi ta la, mi an pa ba chim ŋanta dii nyiŋ la, m dan seba ti Nyɔɔwa Yeezu Kirisita, kula a gaam ŋantaŋa de meena kama nna yegayega. Ka Yeezu sebika nyiŋ ale soa ate maa yaali ayen m va wa nyiŋ a jogi jaab meena la. Dila nyiŋ la, mi nya wari meena ase ka kinla la alege a yaali ayen mi ale wa a kasim

a chim bunyi. Mi yaa ka wayorisima nyono Naawen nin m le ta siaka ale Yeezu Kirisita la nyin. Ku be daa wari ate m nye nyina yaase Juuma kisuktana vaka nyina. Yogyogla alege ta siaka ale Yeezu Kirisita la nyin ate Naawen weeni ayen mi ka wayorisima nyono. ¹⁰⁻¹¹ M be nman a yaali kama ayen m seba Yeezu Kirisita dek nyiini nalimnyiini abe m ta pagrim buui ate Naawen a pa nak wa a yiti kum po la. M be nman a yaali me ayen m namu a kpi a se Yeezu la, ate Naawen a nak mi me a yiti kumu po ate m ga bo ale wa.

¹² Mi kan weeni kama ayen mi poom deri nya wienja de meena ate mi a poli ayen m nya la kama. M be kan weeni kama ayen deri ka nuru welen alege, m chali a de ka nin ayen nya ntanta de, dii nyin la ka dila nyin ate Yeezu Kirisita deka yik mu a nyo wa nisima po. ¹³ M suaata, mi an deema a poli ayen m soa ntanta de, alege m pa m sunum meena a basi ka jaab wanyi jigi. Mi pa njan nyin wienja a basi ka njan, alege a pa m nina ale m popola meena a basi ka wa dii ale bo nin la po. ¹⁴ Mi popola a bo ka nin ayen m nya wannu de, be ka Naawen wiik Yeezu nyin ayen m nya nyuvuri dii ale bo wenmazuk la.

¹⁵ Tama baai ale paari Naawen siuku po la a magsi ayen ti ta ka popolana de chaab. Alege baai a dan ta popola yoana Naawen ale basi ate ni nin. ¹⁶ Wakpeeni meena ale, ni basi ate ti meena a va Yeezu a se ti a ale poom a va wa dii a ta jam paari jinla la.

¹⁷ M suaata, ku a fe ate ni a tomsi mi ale a va Yeezu Kirisita njan dii la. Ti le jam bo ale

chaab la, ti jam sak ni wa wie kama nalimnyiini. Ka dila ale soa ayen ni a tomsi mi dila. ¹⁸ Mi poom weeni nama wienja de a paari ka ku noa di choa ayen nuruba yegayega a zeri Yeezu Kirisita jabarimu wie sinsanja kama. Yogyogla de, m be nman a weeni nyaku de a sak ni kama ale sukaasuj. ¹⁹ Naawen a za ayen wa kaasi bala chaama kama, dii nyinj la ba nyinja koarisana a chim ka ba bogluta. Ba ale magsi ayen ba a chali chivie ale wie naai la ba ta ka kanjanta ale na. Ba a poli ka tenjuk de wie nyiini. ²⁰ Tama ale ba a daa bunyi, dii nyinj la tama ka Naawen dek wenzmazuk po nuruba. Ti a limsi ka ti Nyonowa Yeezu Kirisita waai ale vari ti ti tuimbaatana po a basi la ale nyinbiiri ayen wa basi dula jigini abe wa nman pilim jam ti jigi ate ti tu wa. ²¹ Wa dan jam, wa le tagri ti nyinsana sii ale kan ta pagrim la a nye si ate si a nye a se wa dek nyinja kaai ale ta pagrim ale nalim yegayega la. Wa pagrimu de me a le basi ate wa tigi jaab buuri meena a ta jam wa jigi a soa ba.

4

¹ M suaata, mi kasim ta yaalika ale ni ka nna yegayega. Nama ka nuru baai ale a zak mi zuk a zaani la. Ni a nye ate m sui a peenti me. M dek suaata, mi a yaali kama ayen m weeni a sak ni dii ate nama ayen ni a va ti nyonowa abe ni kpesi yik wa a ta nalimnyiini la.

² Mi a saalim ti toama Yuodia ale Sintiki ale a va Nyonowa la ayen ba ta noai yen ale chaab.

³ Mi ale fi abe ale maa chaab a tom ale chaab la, mi a saalim ayen fi a maari nipooma de, dii nyinj

la, mi ale bala ale maa chaab me a naam ase ti ale sak nuruba Naawen wienja la. Kelement me ale baai meena ale va tama njaan la, a nye ka dila degadega. Naawen be njarisi ba yuenja a nyo nanvuuta yue gbanja po kama.

⁴ Nama baai ate ti Nyonowa soa ni la, ni basi ate ni suniimaja a kasim peenti nna yegayega ti nyonowa nyin. M be njman a weeni ni kama ayen ni basi ate ja peenti nna yegayega.

⁵ Ku kan beni ate Nyonowa njman pilim jam. Dila nyin ku a fe ate ni seba ni dek taka ale nuruba. ⁶ Ni kan basi ate wie a daani ni, alege ni puusaja meena po ni a te Naawen jiam ate wa pa njanta baai meena ate nama a yaali la a te ni. ⁷ Ni dan a nye dila, Naawen le basi ate suyogini dii ate nuru biik an baga min bu kiri a chak la a jam ni suniima po. Nama baai ate Yeezu Kirisita soa la, a dan ta suyogini de, wabiok an baga a jam ni jigi ya.

⁸ M suaata, ni basi ate m pa dii meena ate mi a njmarisi la a gum chaab a weeni a sak ni. Ni pa ni popola kasim basi wie njai ale ka wensie ale ta zula ale a magsi ale welema ale nala njai me ale a peenti nuruba puusa ate ba a weeni ayen ja nala la. Ku be a fe kama me ayen ni kasim a poli wie njai ate fi dan tom ja abe ja ta pimpauk jam ayen ja ka wamansa la. ⁹ A se mi ale jam bo ale ni dii po la, ni wom mi sinsanja kama ale nya m tuimaja me ale jam ka dii la. Ni ba a poli mi sinsanja wie abe ni a tom ni tuimaja a se dila la. Ni be a tom dila, ate Naawen waai ale a te suyogini la, le boro ale ni.

¹⁰ Ti Nyɔɔwa waai ale bo ale mu la, a basi kama ate m supeentik nna yegayega, dii nyinj la ni nman sak mu kama ayen ni popola a diem bo ale mu kama. Ni jam a lij maari mu kama ate ku beni, alege ate yogyogla de ni yaa nman nya siuk ayen ni maari mu. ¹¹ Mi kan weeni nama kama ayen ka nanta ale posim mu. Ku dan poom ka dii mi jigi, mi a poli kama ayen nanta baai ate mi a diem ta la a zuak kama a te mu. ¹² M seba m dek yikka kama ase nyeboka a nin baasa. M be seba m dek yikka kama ase nyeboka a nin pagra me. Juijui meena ate mi boro la m seba kom taka kama ale chakta me taka. ¹³ Yeezu Kirisita a pa ka wa pagrimu a te mu, ate m baga a tu wienja de meena.

¹⁴ Alege ku nala ka nna yegayega ale ni ale maari mu daani kaai po ate m boro la. ¹⁵ Nama Filipai demma, ni seba nalimnyiini kama ayen dii po ate mi lij sak nuru baai le jam bo ten kaai ate ba a wi ayen Masidoniya po la, Naawen wamaɲaɲa wie alege basi dula la nama nyiini ale maari mu siuku po. Nama me ale nya maarika mi jigi. ¹⁶ Mi ale jam bo Tesalonika po la, ni tom tiirim nanta a te mi kama a paari dii choa. ¹⁷ Mi kan potim a a yaali ka ni tiirimu alege maa yaali ka Naawen le wa te ni nyuen tii a magsi chaab ale ni tiirimu ate ni te mi la. ¹⁸ Ni tiirim buui ate ni pa te Epaforodaitus ate wa ta jam a te mi la, a deri gaam mi ale a yaali dii la kama. Nama ale nye dii la a basi kama ate Naawen sui a kasim a peenti nna yegayega. Kula a nye se ka Juuma ale yik duɲaɲa a kaabi a te Naawen la. ¹⁹ Nama dek seba ayen Naawen ta nanta ka nna

yegayega gaam taam. A se ni daa yaali jaab, wa le lueri ba po a ta va Yeezu Kirisita yonni nyin a pa maari ni. ²⁰ Naawen waai ale ka ti ko la, a ta zuli kama yegayega a ta a chej dii po meena wuu. Ku be nɛ dila.

²¹ Maa puusi Naawen nuruma baai ale Yeezu Kirisita ale ka bunyi la. Ti suaataɲa baai ale bo ale mi dela jigini la, me a puusi ni. ²² Naawen nuruma baai me ale bo tɛŋka de po la, a puusi ni ale baai meena ale a tom nakpionku Siiza yenni po la, me a puusi ni. ²³ M be ŋman a saalim ayen ti Nyonɔwa Yeezu Kirisita niaka a bo ale ni meena.

**The New Testament in the Buli language
(Ghana)**

**Buli: The New Testament in the Buli language
(Ghana) (New Testament)**

copyright © 2003 Wycliffe Bible Translators, Inc.

Language: Buli (Ghana)

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 21 Feb 2024 from source
files dated 29 Jan 2022

24aad1ee-9f16-5a40-b094-5b16e513253a